

晚

晴

移

詩

匯

晚晴簃詩匯卷九十五目錄

伯麟 五首

汪志伊 三首

傅顯 三首

呂燕昭 三首

李華國 二首

冒方華 一首

彭淑 五首

胡啟文 二首

倪本毅 二首

曹龍樹 三首

蔣履 二首

陳寅 三首

苗令琮 四首

傅應台 一首

陶廷珍 四首

百齡 八首

章煦 一首

鄒炳泰 五首

鐵保 十首

莫瞻菴 八首

平恕 三首

圖敏 一首

羅修源 一首

裴謙 一首

李燦 一首

許學范 一首

李堅 一首

許兆椿 三首

吳俊 三首

李翮 一首

劉大紳 九首

黃河清 四首

潘有爲 一首

顧堃 二首

陳石麟 七首

晚晴謠詩匯卷九十五

徐世昌

伯麟字玉亭號梅坪滿州旗人乾隆辛卯繙譯舉人由  
筆帖式官至大學士太子太保諡文慎有退思齋吟  
草

詩話文慎詩和平溫厚雖觸物興懷皆有寄託吳巢  
松學士題其集云宰相清如此昇平事可知苦尋詩  
句好渾忘節旄持亦可想其風度也

晉陽示諸牧令

馬疲思解韁魚涸思得水鳥倦思棲枝蜂饑思覓蕊物性  
如斯夫人情可知矣跛者不忘趨盲者不忘視疲癯狀既  
成鍼藥誰能起拯救本無術悱惻猶難已何乃民瘠肥無  
關心戚喜手足常沾塗朝夕負耒耜豈曰飽胥役原爲甯

婦子明察若無遺閭閻得所恃琴堂鑑懸冰花城霞散綺  
窮檐願易償佇聽歌樂只

峻阪車能行顛仆或平陸滄海舟能通傾覆在淺瀆前鑒  
誠非遙歷歷駭心目展驥與割雞虛聲莫馳逐星火燎  
原涓涓流盈谷彈琴不下堂敢云治已肅百里風煙賒千  
家耳目屬置水可投書削木可爲牘片言勿輕棄細事亦  
詳鞠卽小以寓大愼哉爲民牧

善理亂絲者徐徐結自舒善治劇邑者優優政自敷稂莠  
害民稼荆棘牽人裾河陽花不發鄭白渠已枯雖有下邳  
令兇虎猶難除人心不古若拊膺惟長吁寄語諸君子勿  
謂編氓愚訟庭地無隙先宜防吏胥農田歲雖稔尤貴籌  
積儲聽訟息雀角待哺思雞雛仁愛及草木忠信孚豚魚

荀庭羨集鳳喬鳥來飛鳬諸君能如此庶不負簡書

珍錯雖列俎何如菽粟好章服已榮身何嫌錦繡少我自  
筮仕來生計原草草稼穡思艱難豐歉縈昏曉小民日怨  
咨敢以輕心掉惟願諸君子夢與茅檐繞綺羅筵前燭移  
照桑樞槁向隅繁有徒情狀俱了了斤斲與斧削何忍復  
相擾當年皆寒峻今日幸溫飽共期飭簠簋斯民大有造

題楊升菴先生畫像

十年持節滇山道到處滇民話公好大名遺像兩崢嶸氣  
節文章此雄顥當時大禮難具論私恩公義日分門左順  
門前一痛哭遂令異世悲忠魂忠魂一生經九死萬里崎  
嶇到金齒鳳凰折翅猿哀鳴著書談笑空山裏談笑空山  
休問天誰信公來不等閒安邊定亂書生事家僮親手殺

安銓

本傳公在永昌間尋甸安銓武定鳳朝文作亂率平

生愛檢前朝史自使西南重訪此尋甸州連武定州戰地

猶聞鼓聲起西南況復瘡痍久更憶先生調護某止貪救

困在山霖撫衷自問我何有

滇志載先生請止牛鹽稅推

為利督丁夫六千人下海民

苦之先生作書箴告當事 寫韻樓前花亂飛黃蕉丹荔

今何時風吹山鬼薜蘿帶颯颯有人唱楚詞迎神欲奏羅

池曲何人筆力昌黎足不然更譜鶴南飛雪葉千山滇水

綠

汪志伊字稼門桐城人乾隆辛卯舉人由知縣官至閩

浙總督有稼門詩鈔

詩話稼門起家縣令上官初以為迂欲改教職因平反冤獄大得時名游任兼圻生平以理學自命詞章非所措意詩多隨意抒寫卻有磊落之氣

題明顧端文公闢墨遺蹟後

嗟乎國祚昌士氣揚士氣烈國祚折卓哉梁溪顧端文神  
熹兩朝第一人洞穿理窟執道要南畿丙子張厥軍爾時  
江陵位首輔公不私謁通要津郎官誹議竭忠盡不負所  
學自始進晚年講道東林開中以朋黨指黨魁芝蘭刈殺  
蕭艾盛衆君子盡國亦摧誰知白賁守邱園非立氣節樹  
聲援末流賈禍咎攸致羅織豈公意中事抑之愈下揚愈  
高三元齊名泰三爻獨不見晦翁衍心傳鹿洞集大全慶  
元攻僞學名亦最居先又不見晦翁登科錄藏者珍如玉  
況此風檐手澤眞士林傳頌倍精神士林傳頌倍精神道  
南士氣千秋振

初頤園中丞以書來索端硯爰將素用之硯贈之媵



以詩

鈴閣由來有四友鐵面尙書交獨久呵之輒澤扣無聲性  
堅質潤螭瓊玖靜鎮不摧龍鬚鋒坦懷善發元香守其才  
其德兩無倫相與摩挲肯釋手觸來雲氣時騰騰臨池一  
洗蛟龍吼況此區區稱良田一墦笑予勝千畝孜孜窮日  
倒枯腸全藉滓妃才八斗滓妃沈醉墨花香高詠頤園梅  
爲首思梅應擬梁何遜曾消溟池幾杯酒溟池飛來雙鯉  
魚尺素蘊辛胥幼婦殷勤索硯指端溪豈似書生習氣狂  
當年白筆簪蘭臺臺閣風生職不負節旄今擁碧雞山載  
道口碑歌父母敷歷不自曰能賢鐵面婆心無出右惟此  
硯今潤且堅差堪與君作敵偶我何割愛竟與君知君三  
立能不朽知君三立能不朽溫厲蚤希魯中叟

退思圖

誰爲箴規祇自思  
藐躬得失寸心知  
閒參叔簡呻吟語  
細繹香山諷諭詩  
指視嚴於初覺夢  
彌縫愧在未能時  
木蘭堂畔花開落  
顧影愁添兩鬢絲

傅顯字令宜滿洲旗人乾隆辛酉繙譯舉人官至漕運總督諡襄勤有卧雲堂詩橐

靜甯早發

雞鳴野店曉風寒  
一枕清宵旅夢闌  
殘月漸低星未落  
曙光送客過青山

望日宿安國鎮

淒涼孤館卸裝餘  
千里關山路尙紆  
最是無情天畔月  
團圓樂時節照離居

丹楓

秋林無別樹夾道繡丹楓日暝前溪水霜酣昨夜風歸鴉  
迷故緣過客拾殘紅正好停車看春華未許同

呂燕昭字仲篤號玉照河南新安人乾隆辛卯舉人歷  
官江甯知府有福堂詩草

游風穴寺

入山不見山但見古柏樹此柏不知幾百萬株黛色霜  
皮看無數高者如立低如赴橫者如卧斜者覷三三五五  
各盤踞當面齊來迎我步溪轉山迴見梵宮老僧導我幽  
處去層閣俯碧泉游魚樂相聚修篁杳以深亭午留宿霧  
此時心地忽超然可惜洞天難久住長嘯謝山靈行行日  
已暮馬影亂斜陽小橋危可渡沿溪出深山停鞭時迴顧

夢耶非耶心忡忡天光嵐影杳何處晚煙蒼茫平楚流指  
點不是來時路

夜渡

停騎呼舟子霜寒客影稀煙浮春水闊月湧片帆飛戍鼓  
依樓靜雞聲隔樹微酒家何處問徙倚待朝暉

華山

蒼然秋色接雲臺乘興登臨見九垓海日斜連仙掌動天  
風高擁嶽蓮開空濛絕塞黃流遠縹緲雄關紫氣來咫尺  
眞能通帝座振衣千仞幾徘徊

李華國字懋德一字經亭黔西人乾隆辛卯舉人歷官

漳州知府有雙蔭軒集

詩話懋德恭勤子文采斐然歷官永康百色揭陽羅定皆有政績擢守漳州未至卒在永康創修州志其

詩爲法梧  
門所稱

春暮

一雨江光欲近城  
數峯橫翠海雲平  
楊花含溼初飛岸  
野草侵闌不辨名  
斜度春風雙燕語  
曲穿新綠一僧行  
不堪寥落關山意  
三月江南唳亂鶯

勞勞亭

衰柳秋風第一亭  
送人山色向人青  
長隄車馬終年事  
落葉蕭蕭獨自聽

冒方華字相銘號吟樵如皋人  
乾隆辛卯舉人官麗水知縣

壬辰冬日同人集卽山廬分韻得聲字

不管人間歲易更  
客來空谷愜幽情  
一江煙水團鷗夢  
十

月風霜凍雁聲挂壁昏鐙侵鬢冷灑窗白雨入詩情耆英社遠文章在萬古無寒此夜盟

彭淑號秋潭長陽人乾隆辛卯舉人官吉水知縣有秋

潭詩集蟾芝集

摸椿行

賊初起時將至一村集必先得其里一人夜則縛以入其里使之以姓名捶門門啟即殺

先縛者而又縛此人入其室搜殺已即又以所縛者叩鄰之門門啟亦如之搜殺盡一村人無覺者謂之摸椿

夜半黑風吹怪雨前驅豺狼後猛虎鵠鵲嘯羣作人語妖狐頭戴髑髏舞犬不吠雞不號鬼伯叩門求其曹以火來照揮霜刀殺人如草無喧囂東鄰殺盡西鄰及問客何來開門揖千門萬戶排闥入男婦駢頭但柴立尸骸撐拄如邱山祝融入夥飛炎煙以人爲燭光灼天羣魔血牙飽腥

羶干牛炙萬石傾上馬捫腹腹彭亨平原廣廣縱且橫不  
聞哭聲聞笑聲摸樁摸樁在何處千村萬落條條路白蓮  
花死不迴顧搖旗打鼓前頭去

守風大孤山懷謝讓堂

美人隔秋水白日淡湖光岸遠蟬聲細天高雁影長晴波  
捲霜雪別浦入青蒼憶爾一尊酒篷窗詠夕陽

傅靳溪山行

信美山中採薜薇麥田驚起野雞飛東風似遣知春晚亂  
灑桃花上客衣

晚泊九江

寒碧一江橫餘霞向晚晴秋深元亮里潮落灌嬰城暗浪  
搖鐙影迴風帶雁聲蘆花溢浦岸根觸去年情

黃州憶章門諸子

大江春水拍天流，萬頃波中一葉舟。  
南浦故人相憶否，斜風細雨過黃州。

胡啟文字樸園，永綏人。乾隆辛卯舉人，官羅源知縣。  
與孫生

溪州遠上碧雲端，負險當年此彈丸。  
故壘荒涼銅柱在，霸圖消歇土居安。  
蕭蕭往事如黃葉，嫋嫋秋風泛紫蘭。  
空谷有人今是玉，莫言僻陋少殊觀。

水南

碧水蒼蒼護綠疇，荔枝陰外有高樓。  
雲霞鬱鬱凝佳氣，村曲人人識故侯。  
客久蠻情徵瑣屑，年豐旅食待綢繆。  
海天細雨黃昏近，松桂蕭蕭滿院秋。



倪本毅字復山開泰人乾隆辛卯舉人官樂清知縣有  
借春園雪餘集

諸葛洞

萬山如奔馬到此一小東兩岸絕壁相對峙巨石中湧疑  
虎伏雷轟電駭浪花濺水勢爭與石勢觸石怒水號兩不  
讓陰雲慘淡生穀鯁楚南估客不敢上千帆夜泊舞溪曲  
負戴紛紛越山嶺崎嶇恍如蟻緣木瞿塘灩澦古絕險軒  
然大波高於屋龍驤萬斛日經過怪此汹湧斷往復崔巍  
古廟覆蒼苔旁有武侯祠居人爭伺溪洞開嗚呼諸葛何時來  
里諺云若要此洞開須待諸葛來

荔枝船

中冠從今重八閩連根移入上林春朱盆到日迎風熟綠

樹依欄帶露新自是遠臣崇土貢早知聖世等常珍差船  
不用催程緊五月炎歊滿水濱

曹龍樹字松齡星子人乾隆辛卯舉人官如皋知縣有  
星湖詩集

### 焦山

金山見寺不見山焦山見山不見寺山城四立抱寺門竹  
樹藤蘿鎖幽翠波濤之中無波濤天地之外有天地白雲  
黃葉今古情溫巖紆谷中和氣我來此間得靜觀但見林  
杪危檣紛來去掃苔何處問焦君一枕石牀消萬慮莫管  
煙島茫茫海市蜃樓幻奇異

### 漁父詞

賣得今朝魚買夠來朝米收網曬船頭醺然睡去矣蘆花

淺水邊不在風波裏

七十二過澗

二七之數原屬火此七十二水不乾一日涉水七十二過  
水更比過火難五月廿日我到此卓午方開翟家市急促  
征夫趁前程亭長攀轅曰止止此去七十二澗河桃嶺雪  
山風雨多山雨每于午後釀新漲一來人葬波前年豫省  
兵餉到使君不聽良言告嚴催車馬向前行自攬花驄作  
先導豈知霎時雨滿山山濤四面來更暴人騎行李沒處  
尋半賸餉車在泥淖與君同是解餉人其餘不必爲君道  
君請權停半日驂行止明晨僕來報聞言我且宿邸家次  
曉紅旭弄川華萬里無雲天正好急命僕夫起羣車果然  
盤山夾一澗一澗屈曲走驚蛇斷岸千尺攀不上旁澗四

出亂如麻何年吳璘開地網到此真同井底蛙橋約舟楫  
兩難施涉者褰裳等跳蝦車聲鄰鄰輪齧石馬行蹙蹙蹶  
語沙虎豹虯龍各千狀鳥不成鳥花不花前到會甯五十  
里邑宰遣人特道喜我自過來覺平常不料逾時飛白雨  
若使此時澗中行隨波逐浪可知矣想見大雨時行時行  
人多似尾生死我聞秦始皇鞭石有奇方何不驅此陵谷  
作平場又聞西蜀王五丁開徑荒何不鑿此山腰走康莊  
我欲運南山之石鍊汾水之鋼選鄧林之喬木採渭川之  
修篁訪名匠于魯宋在此百丈崖上造成七十二座跨水  
梁

蔣履字禮山臨海人乾隆辛卯舉人官南平知縣有蔚

霞堂詩藁

燕都清明寫懷

山村門徑長蓬藜燕子歸來雨一犁  
坐向小窗春睡足何須朝市問端倪

重過黔南

寒燠變昏旦穿雲去去遲懸崖鳥撒路  
短草暮春時野寺看泉寶山田散雨絲  
歸心正愁寂怕聽鷓鴣詞

陳寅字心田海甯人乾隆辛卯舉人官廣東知縣有向日堂集

黃雲歌

黃雲慘慘日不昨迴風捲地沙亂舞是誰怨氣激爲驚濤  
聲沸天中有十萬八千兵民鬼聲苦舟人告余云是新戰  
場停舟欲覩不忍覩我聞去年此地生妖氛登岸茫茫詢

田父田父涕泣爲余言吾鄉本是繁華土鱗鱗櫛比十餘里水陸交衝納商賈百年涵煦荷國庥自幼不聞喧戰鼓去年妖星落山左一方如遇白額虎聞風早避脫羅網踉蹌不及身被虜天兵迅捷如雷霆摧枯折朽遂立剖崑岡玉石同時焚血肉紛紜那堪數僵尸相屬流水紅百里而外猶臭腐岸上白骨堆如山往往野犬相搏取豺狼已盡狡兔死逋逃稍稍望衡宇行人歸來失舊廬居者失業富者棄金堂珠箔沈灰燼碧檻丹楹亂罌甌夜來四野飛青燐飄飄忽忽散復聚亢戾之氣薰蒼穹自冬徂夏天無雨陌隴枯槁麥不秋飲食同以供三鬴田父田父爾勿憂廟謨日夜厯編戶大臣承旨加恩施不惜帑金用安撫佇看匝地黃雲開甘霖疊沛若膏乳天今福汝善良民或或與

與實倉庾

伊犁漫興

亙古窮荒一旦開如麻白骨亂峯堆  
河魚萬里流腥血石炭千年化劫灰  
雪爲人繁潛作雨天因地闊漸行雷  
於今羈客棲遲處五色山花爛漫栽

自慰

聞說生男冀遠謨四方有志啟桑弧  
也須行盡天涯路始信人間一丈夫

苗令琮字季黃號雪巖山西鳳臺人  
乾隆辛卯舉人官甯鄉教諭有饗天一瓢  
山房津門等集

詩話季黃蚤歲孤寒矢力風雅沈歸愚  
謂爲魯連太白一流人物詩特奇橫

讀元遺山送李參軍詩因寄鐵崖

女莫作玉明君男莫作班定遠尊爲閼氏貴封侯一去邊  
廷竟不返鐵崖趙侯古俠者平生足跡半天下弔古欲射  
錢塘潮依人又躍燕山馬擊筑長安里買醉章華街纏頭  
十萬錦窮愁安在哉西風易水酒徒散酣歌走上黃金臺  
隱居深閉太行足楊柳門前幾回綠四時空失慈母歡一  
朝難得八州督我昔南行七閱月歸來親鬢有華髮空空  
兩手登高堂我母見之若饑渴因憶逢君林屋西君言失  
意今當歸故山春色又週歲白頭望斷萊子衣衣如鶉兮  
馬如狗跋涉三年竟何有請君三復遺山詩扼狐嶺上應  
回首

長平箭頭行

銳頭豎子勇如虎長平穴中鬪羣鼠四十萬人灰燼飛耕



作髑髏山下土狼牙三脊人血腥青碧斑剝銅花生冷光  
射我迫難視吼作丹川嗚咽聲波流赤血下殺谷滿眼污  
泥鬼雄哭寒風颯颯吹陰沙斷鏃殘兵怨馬服吁嗟乎爾  
曹自死平原君趙括小子何足云當時豈無廉將軍昇平  
遺箭猶存在留與耕人作銅賣

### 崇安寺

一徑入雲窩盤迴出薜蘿溪風到門盡山色上樓多衙果  
青猿至衝煙白鳥過空林清楚遠徙倚欲如何

### 讀蓮洋集書後

蓮洋詩格駕漁洋嶽色河聲鎮大荒仙佛因緣擬裴孟公  
卿贈送重錢郎布衣聞望傾三省旅食艱難寄四方慙愧  
誰爲宰相者奇才豈但駱賓王

傅應台字晉三號符菴昆明人乾隆辛卯舉人官永善教諭

自呂堰趨襄陽

望望章臺道遙遙峴首亭雲生三戶白日落萬山青遠雁來衡嶽孤帆下洞庭相思何處是煙樹夕冥冥

陶廷珍字效川號午莊會稽人乾隆辛卯舉人官肅州州同有天目遠游雞肋仇池關河等集

盤豆驛

叢山如破衣人似蝨緣縫盤旋一綫中欲速不得縱高塵接雲霧填塞眼耳空終朝汗如濯膚曝烈日痛荒驛豎孤煙喘定一駐鞚水漿乞茅店安得量瓶甕出關馬已瘠望嶽目猶送長途聊自遣羞作步兵慟

宿射樹坪

磴道盤空盡斜坡接小村半山遙見屋深樹不知門水磨  
喧人語風鐙露石根卸鞍聊住腳雪夜夢難溫

關山

秦中門戶瞰臨洮萬仞崇岡壓巨鼇盤險路分鶻首隘盤  
空入俯隴頭高雲移絕壁開熊館雪滿長溝設虎牢此去  
涼州風土近馬肥苜蓿酒蒲桃

洛陽

瀍流西繞洛陽城海內爭傳赤縣名地枕長河周下邑天  
開神府漢東京故宮秋草銅駝陌老樹斜陽杜宇聲況是  
經過風雪裏藍衫破帽感書生

百齡字子頤號菊溪漢軍旗人乾隆壬辰進士官至兩

江總督協辦大學士封三等男謚文敏有守意龕集  
詩話菊溪撫粵數月調督兩湖去之日士民遮道留  
肩輿不得行至夜乘馬出城作感恩紀事詩其第三  
首云不教藏過幸官身夾路香燈照水濱豈有去思  
留異日從來直道在斯民同其好惡情能洽釀以詩  
書氣自醇付與諸公勤撫字未妨單騎出城闔指此  
事也後復奉命督粵降海盜張保斷從夥百餘人有  
句云嶺南一事君堪羨殺  
賊歸來炎荔枝風致可想

汴梁渡河

竹箭隨流幾曲奔誰探星海瀉高原六鼇排浪迴嵩嶽三  
峽轟雷下禹門城角檣帆秋雨霽渡頭沙蹟暮雲屯河清  
共祝安瀾慶況復金隄次第論

贈杜西林孝廉

典墳淪靈府文字餘芳馨清濁流派遠判若渭與涇作者  
入堂奧祕鑰門常局紛紛訂餽家何由窺儀型杜子老斲

輪甘苦皆已經舉比教不倦光風噓戶庭理窟洞觀火詞  
源高建瓴肘腋驅萬卷囊括無畦町當其興會至洋灑筆  
不停一讀三歎息春夜鐙熒熒金鐘發妙響扣之慙寸莛  
脂炭向矮屋蕊榜聯文星及今斗杓回起蟄來春霆

雨中飲何玉峯廣文齋中遲范叔度比部柴珠江舍  
人不至

金鴉墮水白日匿碧城朵朵山鉤連黑雲如羊在天上挾  
雨騰蹕鳴雷鞭須臾溝澮潦水急怒濤澎湃驚晝眠小奚  
扣門食指動如聞海上傳瑤箋爲言斗酒藏之久況有黝  
甲同擊鮮是日食籠我馬不辭泥至骭淋漓直到官牆邊老饕  
據座箸齊下銀瓶倒瀉吸長川人生醉飽豈易得二豪不  
至何拘牽主人對我慘不樂攢眉但說寒無氈大羅會上

一回首才名流落三十年半綰欲丐升斗粟長官笑罵書  
生酸宿塵堆案弟子散破窗僵卧吟秋蟬我聞此語長嘆  
息士逢知己從來難杜老詩因鄭虔瘦貢禹冠爲王陽彈  
古人交誼重氣節所愧汲引無微權曲逆當年亦貧賤如  
公骨相甯屯遭蓬生麻中當自直丈夫何必求人憐以酒  
酌君觥累百磊塊澆散開心顏王戎起舞唾壺缺壁間況  
有絲與絃天公一笑善解意忽收屏翳明嬋娟留髡日日  
飲一石會須炙輶來談天

書城南寺壁

溟濛花寺隔煙蘿鈴語宵深喚客過走壁龍蛇鐙影動傍  
簷烏雀樹陰多舊游人已隨雲散壯歲心還與墨磨濁酒  
半壺禪榻穩打門無賴是風婆

秋夜寄懷時泉

秋夜鳴秋心涼森掠庭樹短檠一孤影隱几夢屢寤關河  
阻且長伊人美無度寂寥懷好音斷雁隔荒戍  
修篁墜清露月色忽零亂開簾千頃波耿耿溼斜漢我懷  
淒以清感茲節物換人生適意難所遇多羈絆蒲柳畏及  
秋髮白倏忽半思君如寒蛩長吟不能斷

宿西苑直廬同坦園作

山氣沈高閣溪聲過短牆  
禽爭選樹倦客對支牀  
天近星河接官閒歲月長  
故人多好句題壁墨留香

遊尺五山莊簡約齋

五尺城南韋杜莊  
疎簾清簟坐斜陽  
竹坡雨洗梢梢淨  
荷渚風翻葉葉涼  
隱砌蟲聲秋宛轉  
隔城山色暮蒼茫  
筍輿

藤杖尋詩去佳句憑君貯錦囊

章煦字曜青號桐門錢塘人乾隆壬辰進士官至文淵閣大學士諡文簡

題景福泉

謙

雪泉圖

欲寫清白意何如此雪泉幾人同臭味一紙感雲煙是見前生相因添見在緣江湖已歲暮相對正怡然

鄒炳泰字仲文號曉屏無錫人乾隆壬辰進士改庶吉士授編修官至吏部尙書協辦大學士太子少保罷以中允贊善降補有午風堂詩集

還山吟

秋色正蕭灑我行歸故山南山山深斷行路白雲去去何時還秋巖幽絕瑤草碧綠蘿緣洞不可以逕攀長風吹落



嶺頭月流光倒入長林間手持赤城杖飛度蒼霞嶂金仙  
一笑導我飲一杯未竟已神王手解青囊所服之素書但  
見朱文綠字紛殊狀我問靈修笑不語海日欲出天雞唱  
嗟予落拓作人羞此生常作名山游幽澗鳴泉繞石室便  
擬一葉凌滄洲

登燕子磯俯江亭作歌

我騎白黿浮江迴江雲蕩出千蓬萊一峯斜掠落江外飛  
潮倒瀉橫江來乃知石燕啄江渚化作危磯屹如此濤頭  
激突勢更奇三面崕呀不能艤是時八月暑氣收山色在  
水秋江秋歸舟一點天末吳中吾友今來不須與濤湧  
天地愁江妃十隊漫江遊琉璃堆破銀山浮巉崖失勢慘  
欲流坐客不語聲啾啾欲下不下牽衣留我登絕頂逸興

發一飲千鍾未肯歇危塗立足自深穩氣與風濤兩衝突  
俯窺巖洞窈復深解衣欲探蛟螭窟此地誰知別有天漁  
子江潭自出沒桃花何必問桃源攜竿坐待山頭月江潭  
幽絕共忘機殘蘆風定白鷗飛他年重證結鄰約起看煙  
水籠漁磯

登三宿巖

虞雍公題  
名尙存

人言寺在山茲獨山藏寺玲峯何嵌空舊日江潭致巖名  
號三宿勝地雍公次憶昔海陵驕采石百萬幟晨炊玉麟  
堂權潛忠未至犒師非督師轉敗出人意不生裴度忠臨  
安恐終覬翮然文武才貞哉社稷志江帆一夕收千載題  
名字傑閣閱興亡雙塔經移置遊人石磴還尙說前朝事  
靜海起鐘聲江鷗沒沙際

楊建齋寓居玉泉山西盛言流泉之美惠一小甌作

詩謝之

郊畿品名泉玉泉乃第一由來天上味茗笈未殫述支流  
分小勺甘冽療宿疾君住玉山西茶香銷永日見我嘖嘖  
稱一啜或過七我本二泉人幾載綰京秩詩腸枯似藁談  
口膠如漆著屐擬尋山十約九仍失啣軋小車來隔巷疲  
驢叱攜將春甕月貯此幽人室雖無竹鑪煎沙缶松濤溢  
新涼迴角枕清味蘊細帙歸夢到山房僧來話禪律

登岱

蒼崖迴合磴千重直上天門紫氣濃絕頂無雲生下界深  
宵迎日自中峯玉苔陰潤懸淙澗仙佩朝鳴偃岫松經峪  
幔亭頽落盡不須高唱溯登封

鐵保字冶亭號梅庵滿洲旗人乾隆壬辰進士由郎中  
遷少詹事官至兩江總督吏部尚書降洗馬賜三品  
卿銜有梅庵詩鈔應制詩玉門詩鈔

詩話梅庵少與百菊溪法時帆稱三才子書名亞於  
石庵覃溪既登甲科詩名益盛嘗采輯入旗詩集百  
三十四卷進呈詔旨優答賜名熙朝雅頌復手定其  
全集爲十八卷菊溪稱其詩如王子晉向月吹笙聲  
在雲外至氣韻宏深如河流發源天上集中諸作五  
七古出入韓蘇神似少陵七律則唐十子遺音游樓  
霞登最高峯有天外澄江穩不流之句袁子才極稱  
賞之其論詩貴氣體深厚氣體不厚雖極力雕琢於  
詩無當也又謂詩貴說實話古來詩人數百家詩數  
千萬一作虛語敷衍必落前人窠臼果能直書所見  
以造物之布置爲吾詩之波瀾雖千萬  
古人不能籠罩我矣學者多服其言

### 久雨

久雨晝昏黑餘陰暖幽屋天影逗明晦雲腳遞伸縮枯楊  
發新姿低藤下深綠土花夾荒逕垣衣被牆木散髮走廣

野振衣睇層麓潛蛟匝奔湍激雷閉窮谷快意溯清流開襟逆飛瀑六合清氣蟠一吸欲滿腹窅然發浩吟環坐媚幽獨

草書歌

蒼頡不識篆蟲鳥開天荒史籀不識楷古法遺鍾王聖人作書祖造物天地不得留微茫草書有名理盛自漢與唐杜度埒崔瑗狂素階顛張心法授受縱奇變牢籠百態驚愚盲譬如彼蒼鑄萬類物具一體無相妨飛潛動植各有勢短長肥瘦誰能量又如將軍坐帷幄運籌百萬網在綱韓信兵多多益善指揮方位爭趨蹌方其執筆時意靜神飛揚洪爐火激迸列缺晶盤冰滑流珠芒蒼鷹盤雲縮爪甲奇石攬壁春硯硯陰陽姤接作向背子母孕化交縱橫

枯槎百圍臥瀚海女蘿千丈縈扶桑忽然墨冷筆華涇陡  
接渤海波瀾狂書成不快意大叫週迴廊舉頭天尺五雲  
物相低昂欲礮太山爲研石欲抉東海爲墨莊凌鑠大塊  
寫生態睥睨雲漢摹天章二十八宿走且僵帝女大笑揮  
霞觴丈夫師古但師意安能描頭畫腳忍與朽骨爭婞婁  
我歌草書歌未央飄風驟雨來虛堂依稀不曉神靈意莫  
向蛟龍攫處藏

### 古赤銅刀歌

天地起肅殺蚩尤作五兵赤刀重天府鑄出昆吾精古來  
神物有顯晦茲刀何以鳴不平森森入手不盈尺古製斑  
剝難知名建平永安年號闕玉環金削無眞評鵬鵠膏冷  
土花澁烈鱗形蝕寒芒清赫連龍雀耀冰雪苻堅神術埋

榛荆何人新豐醉貰酒何人燕市歌送行遂令三寸露光  
怪神彩奕奕聲鏗錕我把此刀重歎息古光照人雙眼瞪  
背嵌翡翠色閃灼柄刻蝌蚪紋縱橫胡爲塵埋數千載吹  
毛削玉功無成今茲出土尙完好發矂一鼓揮長鯨吾聞  
寶刀貴大用一嚮之割非所爭善刀而藏計亦得鋒鏑內  
斂韜光明慎勿小試鏤鄒鈍翻使牛刀笑武城

後赤銅刀歌疊前韻

君不見干將鏤鄒世必用祖龍作計徒銷兵首山赤銅躍  
大冶牝牡變化韜元精當時鑄此豈無意擎出欲剗君山  
平遂令造物忌刻削埋垢千載無知名風雨剝蝕鏽鏑鈍  
鉛刀一任人譏評質擬赤金重色如秋水清不入呂虔佩  
遑問聶與荆蛟龍避藏魑魅走深山大澤堪橫行胡爲匿

影書案側寂然鉅響收鏗鉤陰房夜吹鬼燐碧毛髮淒緊  
睛雙瞪龍賓不出脈望死畏此雪鍰寒光橫摩空巨刃乏  
神力懷鉛握槧終何成有客南山殪猛虎有客東海殲長  
鯨書生喜說萬人敵乃於文陣矜鬪爭用違其才器不利  
湛盧精銳羞蔽明何如寶劍遇雷煥化作斗氣騰豐城

蜀鏡詞

鏡徑三寸六分重十兩有半背作寶相花入  
盛雙魚海螺之屬銘曰鍊形神怡瑩質良工  
當眉寫翠對臉傳紅如珠出匣似月停空綺窗綉  
幌俱涵影中凡三十二字小篆按張君房麗情集  
載蜀後主衍幸鳳州天雄節度使王承休  
妻嚴氏有美色衍愛幸之賜以妝鏡云云

貪狼風起角聲勁一夜宮妝醉猶靚歌殘月缺百寶灰拾  
得當時破銅鏡鏡背猶鐫寶相花龍垂鳳倚爭盤拏三十  
二字篆文古曾隨折戟埋黃沙青城山下人如玉鼓聲震  
破甘州曲寫翠傅紅能幾時紫珍神死苔紋綠金精玉英



光陸離興亡有鑑誰能窺方頤大口諛貴相咄哉狎客詞  
多厄天陰月暗扶天閣颯爽英姿劍芒灼一從取贈天雄  
軍美人笑奪羣雄魄吁嗟平君王愛鏡鏡蒙塵蟾蜍夜蝕  
悲青燐化爲三趙村邊土愁照宣華苑裏人

破寺

破寺何年建荒涼四壁存驚沙埋野徑冷日抱頽垣夜黑  
鷗爭樹人稀虎到門更無僧駐錫鐙火息朝昏

春夜

北斗崢嶸鑑薄帷讀書聲緊漏聲遲烏嚔偃月初暝後鼠  
竄枯鐙欲跋時壯志漸隨春夜老苦吟未許硯冰知放翁  
詩卷嗣音少後五百年狂者誰

登攝山最高峯

危峯削劣千巖外，瘦削芙蓉入渺溟。  
龍虎氣蒸鍾阜白，金焦影蘸海門青。  
時平莫問山多隱，僧老方知藥有靈。  
欲訪江郎舊亭館，碧雲紅樹幾飄零。

書懷

珥筆韜弓出玉關，周妻何肉累全刪。  
夢依吳越江山外，身到崑崙碣石間。  
刁斗不聞沙漠靜，簿書常簡柳衙閒。  
白頭尙有登瀛福，坐擁殘書伴老孱。

華髮蕭騷事遠游，萬三千里此淹留。  
乍依西域日中市，親見黃河天上流。  
兩路回夷分彼界，八城將帥喜同舟。  
半生謫宦超都護，投老涓埃懼莫酬。

莫瞻菴字青友號韻亭，廬氏人。乾隆壬辰進士，改庶吉士，授編修，官至兵部侍郎兼順天府尹，有硯雨山房。

詩集

粵東詩與陳簡亭同賦

水浮天遠望無涯  
四季如春暝更加  
荔子香生三伏雨  
木棉紅起半天霞  
寶行海鬼知均稅  
畫艇珠娘號載花  
比戶檳榔堆滿棹  
便於享客當烹茶

合浦還珠待孟嘗  
伏波橫海舊開疆  
吸筒春曉餐蕉露  
曲簿秋晴曬蔗霜  
恨靖蜃樓都斂息  
時清蜃戶亦馴良  
六篷船倚檳榔樹  
處處飛紅看佛桑

續前題與宋奕巖同賦

唐宋人驚瘴癘天  
天荒破又幾多年  
嶺南總是同文地  
海外兼通載寶船  
獵盡鳩媒消毒種  
潮逢龍媾採香涎  
韓蘇遺蹟應還在  
摹向端溪硯上鐫

地接扶桑日早烘探珠人勝掘雷公洋行領袖聞商占苗  
洞山川象郡通孔雀尾開金扇綠巨蝦壳製寶鐙紅悔航  
往往風旋去吹墜山頭一葉同

題王覺斯畫山水

昨夢茫茫燕子磯煙雲渲染景依稀山圍白下青如許留  
待何人賦採薇

再覩燕山鳳闕雙年年漁叟憶煙江子陵未約君同去誰  
畫巖灘七里瀧

春坡臥犬圖題和朱素人韻

獵罷春眠襯落紅恥隨狸隱繡簾櫳主恩報後金鈴解溷  
跡桃源洞府中

梓桐祠訪朱白水

吳門驄馬澳門船  
薊苑重歸又幾年  
江瀆東流終到海  
星文北拱總朝天  
畫留兩代傳家筆  
貧賣三春種藥田  
依舊叢祠租屋住  
相逢訝我鬢蕭然

平恕字寬夫又號餘山浙江山陰人乾隆壬辰進士官

至戶部侍郎有留春書屋詩集

詩話餘山生際承平迴翔館閣輶車所至搜奇訪古  
悉寓於詩門下士金匱願皋序其集謂爲風雅亦江  
山所助誠確論也

清遠峽飛來寺是日阻風

西峽何有空雲煙  
二禺獨富林與泉  
泉聲百道出澗谷  
樹影密鎖重崖圓  
我從白廟溯中宿  
迢迢百丈山腰牽  
峰回路轉入凝碧  
一灣綠淨波淪漣  
今朝況是浴佛日  
入門贊歎朝金仙  
禪房雖好未暇坐  
欲趁腳力窮幽妍  
古苔滑汰

入石犖确半嶺瀑布懸奔川小亭恰占瀑勝處烈風迅雷  
下九天松聲水聲不可辨咫尺霧雨羈層巖山僧留客淪  
清茗佛桑一株紅欲然飛來古寺更絕頂細路策杖螺盤  
旋杜鵑苦號山木戰紺霜夜降丹葉鮮嶺南少紅葉今峽中四月見之山深  
故寒也試登高處一憑眺三十六峯羅眼前濛濛雲起溼衣  
袂颼颼風緊無行船歸猿洞古碧環杳阮俞徑在蒼瑤堅  
僧言此寺歷鳳背兩厓展翅如騰鸞果然便恐復飛去榕  
根藤蔓牢糾纏脫巾松下聊小憩了了不覺空塵緣幸逢  
不晴復不雨得攜賓從頻流連羽人縹緲不可接薛文斑  
駁誰所鐫搜奇攬勝十日少走馬來看安得全臨行更訂  
六月約要聽萬木吟風蟬

龍爪峽

桂陽山攢劍鋒快峽裏諸峯都倒掛萬條鍾乳作之而日  
炙風吹堅不壞兩厓岌嶮關飛動俯瞰江心弄澎湃蟠蟠  
盡護蒼黑雲雷雷欲起雷霆怪左擎右攬向客舟引蔓懸  
藤爲驂絙升天戲海聊一見導以霓旌蔭華蓋緣厓滴水  
已如簾更挾銀河瀉清派一掌擎空瀑怒飛散作滿川煙  
雨靄輕如夢絲濃若雲末半隨風捲天外頗疑取水作甘  
樹噓吸川巒成狡獪中流墮石亦大奇細皺玲瓏勝雕繪  
泝流漸進知更佳平生已覺茲游最

自柳泉至彭城

黃流宜迅不宜緩迅若激箭流乃安遇隘縛虎束必急寬  
則設險揚其瀾古人豈不慮舟楫不以小利遺大患龍門  
底柱天所制縷隄整石人工殫力與水戰始得畫隄守要

使沙隨水去爲其難有如呂梁百步洪神禹不鑿留噴阮  
何年任塞作平地上流失險致弱單一曲一直天意亦如  
此務蓄全銳如飛翰譬若行三軍大將宜桓桓軍令不專  
肅所過皆凋殘奈何黃流底淤滯成高灘前年豐沛過水  
處今變沃壤家室完去年曹汎決未塞浸及銅嶧無遮闌  
蕩漾四五百里間瀦爲大澤清不湍連朝廷折傍水走但  
見青影浮巖巒今朝挂帆三十里楊柳披拂同蒲萑上隄  
試望河舊蹟繞城一綫如蛇蟠高於漫水八九尺此不可  
掘彼又何時乾聖人憂民切拯溺上策善建防河官

圖敏字時泉滿洲旗人乾隆壬辰進士改庶吉士授編  
修歷官內閣學士有時泉百一草

詩話時泉任司業丁內艱以旗人無終喪禮乞病假  
開缺守制服闋後適高宗召見掌院阿文成公詢



問翰林何人學問最優以時泉對卽晉侍講素喜吟  
詠而橐多散佚其子雲樵從交舊處哀聚之僅百分  
之一云

### 過灤河

不問灤津兩度秋滔滔依舊繞山陬沙明兩岸沿疎柳橋  
隱雙虹臥碧流輪向怒濤聲上轉雲如奔騎足間浮陰晴  
萬壑歸延攬遙指前途說舊遊

羅修源字星來號碧泉湘潭人乾隆乙未進士改庶吉  
士授編修厯官侍讀學士有湘煙書屋詩鈔

### 九月崇效寺登高因至法源寺

空庭落葉又成堆近郭招攜勝引來古寺夕陽偏有色寒  
香老圃未全開圖傳妙墨松聲寂閣倚晴空雁影迴珍重  
大安殘碣在恩恩更與拂蒼苔

裴謙字子光陽曲人乾隆壬辰進士改庶吉士授編修  
歷官侍讀學士有竹溪詩草

讀李布樂布列傳

梁楚燕齊各播名將軍義氣並縱橫壯夫珍重千金諾烈  
士從容五鼎烹堪羨曹邱能揖客可憐彭越爲徵兵髡鉗  
傭賃都非辱有志從來事竟成

李棨字滄雲長洲人乾隆壬辰進士歷官順天府丞有  
惜分陰齋詩鈔

王蘭泉曰三百篇皆以所能鳴顧未嘗自稱其詩惟  
吉甫作頌乃以爲穆如清風而謝公論詩亦言是語  
最工李君滄雲生吳下吳之風古未嘗列於十五國  
也而讀其詩穆然以和澗然以清風而進於雅非有  
得於吉甫之旨不能

讀韋左司詩

恬澹本性情下筆便高潔常能參妙化自得養生術我讀  
韋公詩一生無滯鬱曠然任吾天言動由真率淵明後一  
人冲虛亦樸實唐書攷新舊無人爲撰述詩人失傳多惟  
公不當佚自公爲衛郎意氣近豪俠折節復讀書至味歸  
清絕一麾出守郡隨處留詩別真機舒性靈淡然天籟發  
掃地坐焚香習靜神無奪豈必求神仙何用更學佛開元  
至貞元百餘十歲月人皆見公容精神不衰竭有詩送太  
白無與少陵筆或者未識面蹤跡天涯闊清景憶平生空  
山求隱逸晏起望青天園林愛藏拙應知養主事詩外無  
他物神來有化工終身無疾疾千秋乘至誠夢想依歸切  
許學范字希六號小范又號芋園錢塘人乾隆壬辰進

士歷官刑部員外郎

詩話芋園先世佐洪文襄幕有陰德芋園知雲龍州  
定鹽井均輸法有惠於民母馬年逾八十五世同堂  
及芋園又得元孫母猶健在賜額曰一門再見七子  
皆登甲乙科芋園居橫河橋從弟修門居金洞橋武  
林世族首二許猶  
裴氏之東西眷也

### 玉岑樓紀事詩

愛研載籍列丹青王母雲旗擘巨靈躡括名山柱下史虛  
靈妙果佛天經畫圖細寫荆關筆事蹟分題鍾郝型一樹  
藤花陰滿院清風曲檻挹微馨

李堅字敬堂祥符人乾隆壬辰進士歷官刑部員外郎  
有萱壽堂集

### 新秋雜詠

薄暮天氣佳翠黛潑遙嶺重重抱煙霞曖曖帶光景況逢  
新雨過微風送清冷松花灑面輕微芳靜彌永連峯寒響

深晴霄孤鶴騁素心亦何如人與空山靜

許兆椿字茂堂號秋巖雲夢人乾隆壬辰進士改庶吉

士授編修官至漕運總督有秋水閣詩集

詩話茂堂初自詞林入諫院言事作時相降刑部郎  
迴翔中外三十餘年撫黔浙粵三省督漕皆有惠政  
自桂林上官淮浦經善化縣贖誤漕爲糟寄以詩曰  
平生不作醉鄉侯況復星輅速置郵豈有尙書兼麴  
部漫勞明府績糟邱讀書字要分魚豕過客風原是  
馬牛閒說頭銜已遷轉武岡可是五綱州時善化令  
已遷武岡牧  
故結語調之

題吳明府石門山圖冊子

荆山揚鍰爭摩天欲斷不斷浮蒼煙千盤萬疊石門出峭  
巖一坼流奔泉橫橋直架洞底壑漱瓊鳴玉聲濺濺溪風  
吹翠溼欲滴老樹挂壁根空懸梯山鑿石盤鳥道古藤百  
尺愁攀援茅檐一一負嶂立夜半駕鶴來飛仙如何造物

不自惜更於絕壁窮雕鐫懸青萬仞門呀然一步一使心  
迴旋如鴉蝙蝠撲人面似乳石髓滑不堅天風掃斷塵埃  
蹟杳杳時有閒雲眠使君青眼了不負亂山堆裏居三年  
拂衣一旦擲官去綠陰處處嘯春鶻祇留山色在圖畫未  
妨羞澀囊無錢驅車京洛塵滾滾興劇一放黃州船雪堂  
月好快把酒江天萬里清而妍此時披圖發長嘯石門之  
山落眼前要留面目對山色豈可骭骹供人憐我歌未已  
君忽笑此語未足聞時賢置圖一鼓瀟湘絃衆山響笑空  
中傳

過萬小莊與同人小集

塞上雲多易作秋垂楊何處起邊愁羣山碧重煙初合魄  
月明生火已流小立森寒添半臂大言論事愧長頭無端

搔首驚清聽不斷飛鴻叫遠洲

上元日山海關卽事

春月初圓第一宵別離草草路迢迢還家夢是今朝好明日關城隔更遙

吳俊字曇繡吳縣人乾隆壬辰進士歷官山東布政使有榮性堂集

陸太守朗夫招飲賦謝

濟南太守與我厚僚佐森森匿屏後惟將華嶠兩山雲付與詩人納懷衷玲瓏窈窕看不足更向城南弄鳴玉道人十日九逢迎顛倒餅罍貯寒綠太守憐我苦吟詩邀入寒廳共酒卮軒前老鶴側翅舞華鐙競奏竹月絲歷山城頭亂撾鼓一縷涼蟾漏秋雨籃輦扶醉獨歸來急爇松明煮

雲乳

立秋後七日省中夜直

北斗七星低可捫禁城鐘鼓動黃昏心懸連日羽書至坐  
覺一更草露繁燭花然夢弄孤耿秋樹語風多暗喧樓角  
迢迢轉河漢攬衣不寐欲忘言

羅舊驛館

行看嵐翠潑人衣坐覺溪光冷入幃境美最貪茶後睡身  
輕差熟夢中歸山銜楚雨黔雲起鳥掠湖煙嶺樹飛一曲  
芷江清徹底美人不見思依依

李翮字逸翰號春麓又號約庵金鄉人乾隆壬辰進士

歷官浙江杭嘉湖道有秋影山房詩橐

重過瓜洲卻寄雨窗中丞



金焦似惜別被蘿水中立挂帆山影移瓜洲泊蘭鷁南望  
通虎林北去是鳧繹循陔同素心往事動人憶愛日各舒  
暢聯舫度潮汐甘脆互相獻承笑分餘瀝春旗楊柳風滿  
路皆歡色此樂倏如夢今生不再得九載重握手病鶴歸  
飛急江路此經過撫景心惻惻夜來水聲咽重爲余歎息  
劉大紳字寄庵寧州人乾隆壬辰進士官朝城知縣署  
武定同知有寄庵詩鈔

詩話寄庵宰朝城舊有疑獄未能決部議當流曹單  
民釀金贖公辭委之車中行過某地河決盡用以濟  
溺民未及流所新城曹單民復釀金贖之知終不合  
於時棄官去送者雨泣皆呼青天寄庵自言於詩博  
好唐宋大家嗣從王李格調之說後則奉新城神韻  
爲圭臬而兼用近人之所謂性靈者常謂格調中未  
必有神韻而神韻即在格調之中神韻中自有  
性靈而性靈不能在神韻之外論者以爲知言

答客問山中

曾爲山中客記得山中路曲折清溪間轉入雲深處門前有桃花屋後有梅樹今日梅花落君看桃花去

與長山道士修一

羽客關東歸自言得祕術五年居深山專直如一日山中有猛虎爪牙利斧鑕洞底有修蛇目光照石室土人經見慣時亦或股栗羽客十餘人洗心藏於密晝夜門不關虎羊而蛇蛭自是身意忘甯關物我睚卽今城市間虎蛇未可必願如深山中庶幾保無失

城頭看落日歌

百雉城頭看落日大如車輪去何疾須臾倒影失空青勃鬱紫光迸飛出東南雲氣奇爲峯嵯峨陸離幾千重西北晴霞散成綺疑駕彩鸞驅赤龍頃刻雲收霞亦斂半天紅

東坡全集卷之十三  
三  
爐火閃閃直教海水鎔丹砂傾向層霄未能染城腳下視  
烏鴉歸隻隻背上金色飛晚景如斯真可樂豈必崑崙馳  
斜暉造父停鞭聽吾語汝縱欲追何處去銀河淺淺朱樓  
深又見疎星度牛女

潭西精舍晤桂未谷廣文時未谷暫請假

夫子無爲者蕭然此賦閒新疏泉一道小築屋三間避俗  
偏鄰市參禪不閉關恩恩歸太早何日再追攀

贈牟松巖主政

巷有苔痕座有塵多情杖履轉相親羣將善罵依名士獨  
以無爭到古人花受風光原勝雨山含秋意不如春龍門  
晉接今容易從此交游日飲醇

贈王蘭畹董竹溪二孝廉

王郎矯矯雲中龍當霄吐氣飛白虹長安人海時自雄天下健者惟董公跼天躋地羞庸庸高巖巨壑生松風二子論文非苟同炯然各具雙青瞳新城秀水兩宗工南施北宋爭雲從四家幾欲千古空後生小子多惛慵偏將腐草嗤祝融此如人已登岱峯我猶侈口談東蒙吁嗟菲薄眞何裒師門弟子身可終安能糞壤污鴻濛近覩二子開心胸其光奕奕聲隆隆人間得此如駟蛩何當鞭石東海東相攜大醉蓬萊宮慎無笑我心有蓬

贖歸引

出關何年無入關亦時有誰知七品郎官歸贖自兩縣百姓手官視百姓如仇讐百姓視官豈父母云何兩縣風氣殊謫戍其官引爲咎或咀於社或祝神或聚而哭或狂走

或欲慷慨三公陳或欲匍匐九閭叩其小人曰必歸公公  
不卽歸我顏厚其君子曰必歸公公之歸也義不苟方今  
天子眞聖人仁孝聰明本天膺公有祖母年及耄公有母  
氏亦多壽若公之子以情聞公不當歸衆人後緩贖之說  
古有之國典公誼兩無負龜卜筮卜卜吉同衆乃唯唯不  
否否青錢早信輸乞兒白璧不煩待良友風霜奔走皮膚  
皴道路哀號面目醜萬千人心同一心長安市上歎未有  
春風策馬居庸還關內依依曳楊柳繪圖題句盈篋笥其  
榮乃與使相耦回首一官值幾何天之玉成意非偶於今  
歸來月八九處處家家進雞酒深閨兒女無所知往事言  
之尙疾首自愧無德何以堪作此詩焉志永久誰與兩縣  
新城曹誰與贖者一窮叟

瞻楊升菴先生遺像題後

議禮何人集上臺東華哭罷極南來簪花擁妓神仙骨縱  
酒狂歌宰相才生得中谿堪作主死求太白可同埋先生  
自愛名山老不是君王不放回

南詔碑歌

開元宰相魏公逝金鑑千秋瓦礫視天寶宰相楊國忠不  
恤唐家帝業墜御史太守皆重官何況堂堂節度使辨明  
賄入權門中未夕龍光已立致南邊雲下爲荒陬此輩安  
能萬里寄誅求法令交相加如以飢狐餓虎餒狼子在野  
心難馴不德何鹿不走避知古李旣絕姚雋朝王煜亦貪  
蒙舍利國小衆分聽指揮以一並五制不易可憐宗女歸  
南蠻龜茲樂部遠頒賜敬義黎未還虔陀張張上位貪淫

太縱恣飲酖難酬君王恩辱國空貽將帥媿當年若省楊

羅顛何至中官

賈奇俊

逞魑魅鮮于仲通何人哉甫薄白厓

敵已備軍將儉魏

段

虓虎如天運

王

空作點蒼次西洱河

邊金鼓衰八萬唐兵剩有二胡顏遁去生見人請看吐蕃

正得意南國大詔兄弟邦金印煌煌號東帝冠帶珂貝駝

馬牛倚祥樂進捧冊至鳳子大將有告身贊普鍾且改元

志遂令李宓何履光再將十道重兵棄軍忌深入猶不知

一遁一沈並可罾竟樂京觀龍尾關二十餘萬國殤斃是

時君王方色荒沈香亭畔豔妻醉宰相掩敗仍敘功在朝

文武半諧媚南蠻拍手笑不休德化豐碑蹲最屨其心自

望唐使來其言深荷吐蕃庇官寮寵幸都尋常盡載碑陰

發長喟降人鄭回甘撰文流寓御史乃作字是爲天寶十

有三明載天子幸蜀地我聞稗史言戰時閣邏鳳妃術怪  
異閭陂和尚鳳其昆一朝千里忘險陂煌煌天朝十萬兵  
維彼妖人殲其類固知此語荒唐多干羽兩階有往事白  
衣山人亦吾師招撫吐蕃斷右臂蜀中鎮撫兼得人鐸稍  
鬱刃納天吏頭盤跳脫金銀光樂部歌姬老猶侍足明向  
背當日心憂國有人定殞淚惜哉一叛四十年封岳祀瀆  
已僭擬太和門外望殘碑欲攬天威逕前轡天子須聖宰  
相賢其次以謀或以智前有李泌後韋皋高駢繼之快人  
意不見貞觀細奴邏刺史錦袍早在笥

黃河清字文徵號潤川臨海人乾隆壬辰進士官宜春  
知縣有樸學堂詩集

棧中雜詩



入棧始益門日與平地遠山深箐復密時就茅店飯崖腹  
洩雲封壑隙奔雷輞萬盤梯青冥一竅鑿混沌俯窺怪鳥  
巢橫穴猛獸圈人肖木皮癭石鬪鐵蹠踈壯哉淮陰侯漢  
道首開墾放翁志亦豪秋風思磨盾慷慨懷昔人努力上  
修阪

崇山夾人行古道行逾仄天罅藤蘿光晝蔽楓林黑陂陀  
遞出沒明暗俄通塞相遇但聘貽停驂仰脅息去路窄不  
知前途暝日色

宿霧挾嵐飛路向霧中上霧倏在下方人作天際想眞如  
寥廓翔梧竹許嗣響驚飈忽吹開絕頂延清賞秦山貼地  
堆秦川平若掌居高誰思危一落千丈強

暝投山莊

未知何處宿深竹一鐙懸野碓春明月山籬漱暗泉叩門  
孤客倦具黍主人賢安枕翻無寐沈吟木雁篇

潘有爲字卓臣號毅堂番禺人乾隆壬辰中正榜官內  
閣中書候選道有南雪巢詩

侍御灘

咽石奔流急灘聲晝夜哀千篙齊屈鐵雙耳震聞雷涉險  
乃前定思歸將再來如何當暑月霜氣逼烏臺

顧塋初名陶尊字堯峻號思亭宛平籍長洲人乾隆癸

巳召試舉人官常州教授有鶴皋草堂集

詩話思亭應召試詩題爲春水船如天上坐是時  
高宗正巡視天津淀御製擬作用析木津屬對未愜意  
諭就試諸士皆用此事思亭句云分明析木津前過  
最是桃花漲後宜大稱旨朱筆規其旁定第一一時  
傳誦思亭篤於內行詩中思親念  
弟纏綿惻怛尤多表章節烈之作

澹園

亂山秋欲老曲徑葉還飛行盡鳥嘯處方知客到稀苔紋  
深印屐竹翠溼沾衣坐久心俱澹層臺斂夕暉

重至石城橋贈別

江北江南漾麴塵石城煙柳不勝春如何前度銷魂樹又  
向西風折贈人

陳石麟字寶摩海鹽人乾隆癸巳舉人官山陰教諭有

小信天巢詩鈔

詩話寶摩系出宋菊磻居士九萬翁署所居曰小信  
天巢者紀世美也績學工詩教授越中門下成就甚  
衆爲時所稱王惺生謂其詩得眉山西江之  
意七言古近體渾脫瀏亮頗亦近於放翁

白雲山

白雲不爲雨化作窈窕峯峯巒杳莫辨時見雲濛濛我行

入雲中雲氣扶孤筇撥雲露山骨始覺微徑通鳥嘯石竹  
翠池照巖花紅攬衣下絕巘斜陽挂孤松臨風發長嘯清  
響答遠空挂頰一回顧茫茫白雲封

石柱峯

峩峩兩高峯對峙盤煙霧有石爲幹柱草木絕依附撐空  
幸不孤特立固不懼猿猱不敢攀飛鳥不敢度倒垂日腳  
寒仰受雲氣護削非鬼斧成突使行人怖山靈骨無頑相  
看得奇趣陋彼亂石岡或倚或僵仆

秦望山

遙破由拳地脈摧東南厭勝祖龍來試看芒碭生雲氣回  
望咸陽付劫灰山鬼有靈知歲事神仙無藥澹人災三千  
海外童男女想見桃花別島栽

秋吟

把琰持螯素願違昔時芳草夢依稀春華庶子誰言采秋  
士淮南怨未歸舊燕飄零猶作客敗荷蕭瑟不成衣援琴  
正值涼飈發遠望白雲何處飛

戊申秋暮過揚州弔南園兄

江風送客晚蕭蕭月冷燕城第幾橋曾是白頭漂泊地夢  
回重聽廣陵潮

夢游大滌洞天歌

我聞道經三十六洞天近者莫如大滌山前身何年枕石  
眠至今夢中遊戲如飛仙仙乎窟宅誰卜築洗髓伐毛凡  
幾族清風颯颯浣我腸流水泠泠濯我足仙禽無形但聞  
聲搗藥似喜還丹成真人丹鼎何處瘞青青翦葉無根蒂

巋然兀峙洞霄宮紅日杲杲懸當中前有奉祠後提舉

李忠

定公朱文公有遺像

二公之神自千古山精木怪遠遁逃虛堂晴亦

飄靈雨烏虓蓬萊弱水有清淺無塵古殿爲焦土老仙不死閱滄桑願與忠臣孝子共此日月長姓氏不須留片石空虛之中靈境闢逢人說夢我非癡高山景行嚮往之吾宗衣甫舊游此九峯景物能屈指臨安近在咫尺耳徧游五嶽從茲始

### 青藤書屋歌

青藤山人呼不起至今猶見青藤枝孤根入土走蛇虺老幹出屋蟠蛟螭藤花垂青不垂紫與天一色覆天池天池之源分天漢靈光特顯山人奇山人負奇有明時才名深受幕府知

胡公憲

戟門夜開布衣入長揖談兵人聘貽佯狂

終免一世殺投老快與十子齊大雲坊裏降生處安石榴  
花安在哉藤如老仙長不死古屋數椽神護持物傳有數  
奇者貴重以手植誰能摧退巢居士大書在陳老蓮洪綬閱數  
姓後名不移無波徵君裔孫秀名賢宅里嚮往之重葺家  
塾薦蘋藻更乞鉅製懸高齋中丞阮芸臺先生有重葺青藤書屋記我來書  
屋瞻遺像藤陰習習春風吹涼秋花發杯酒酌南山何處  
青蚪飛

晚晴移詩匯卷九十五終